

TPPA: Hak Bumiputera tetap dilindungi

KEKHUATIRAN pihak tertentu tentang isu Bumiputera dalam Perjanjian Perkongsian Trans-Pasifik - TPPA terjawab apabila Menteri Perdagangan Antarabangsa dan Industri, Datuk Seri Mustapa Mohamed menyatakan jaminan kerajaan bahawa semua dasar Bumiputera tetap dilindungi jika Malaysia membuat keputusan untuk menandatangani perjanjian itu. Ini termasuk berkaitan kontrak kerajaan, perusahaan kecil dan sederhana (PKS) serta industri halal. Beliau memberikan kenyataan tersebut dalam sidang akbar yang diadakan di Putrajaya baru-baru ini.

Menurutnya negara mempunyai agenda Bumiputera yang mantap dengan wujudnya agensi seperti Unit Peneraju Agenda Bumiputera (TERAJU) dan Majlis Ekonomi Bumiputera yang dipengerusikan sendiri oleh Perdana Menteri. Oleh itu kerajaan akan terus melakukan yang terbaik untuk melindungi kepentingan Bumiputera.

Sebelum keputusan mengenai TPPA ini dibuat, proses peringkat awal ialah melakukan kajian analisis 'kos-manfaat' yang akan dilaksanakan oleh Institut Kajian Strategik dan Antarabangsa (ISIS) serta pihak audit terkemuka Pricewaterhouse Cooper (PwC) Malaysia. Melalui maklumat analisis itu barulah ia dibentang untuk dibincangkan dengan lebih lanjut oleh rakyat, Kabinet dan Parlimen.

Tambahnya, orang ramai boleh menilai sendiri kandungan dokumen rasmi TPPA apabila ia dimaklumkan kepada umum dijangka akhir bulan ini atau awal bulan hadapan. Selepas itu perbincangan akan dilakukan dalam mesyuarat Kabinet dan kemudiannya dibentangkan di Parlimen untuk dibahas dalam satu sesi khas pada Januari depan. Untuk mendapat kelulusan, pihak kerajaan memerlukan sokongan majoriti mudah di Parlimen nanti.

Jika Parlimen memberi persetujuan maka peringkat seterusnya ialah proses ratifikasi dijangka mengambil masa selama dua tahun.



ALIMUDDIN MOHD. DOM

Apa yang menariknya dalam kebanyakannya rundingan mengenai TPPA adalah berpihak kepada negara kita. Fleksibiliti dan keistimewaan turut diberikan termasuk dalam perolehan sektor awam dan perkara yang tidak melanggar Perlumbagaan ata berkaitan dasar utama negara.

Ini membolehkan kajian mengenai pindaan peraturan atau undang-undang dibuat dalam kalangan negara anggota. Selepas proses ratifikasi barulah perjanjian ditandatangani dan dijangka mula berkuat kuasa pada awal tahun 2018.

Mungkin ada yang bertanya, apakah sebenarnya TPPA itu? TPPA atau dalam bahasa Inggeris *Trans-Pacific Partnership Agreement* adalah satu perjanjian perdagangan antara 12 negara yang terletak di rantau Pasifik terdiri daripada Brunei, Chile, New Zealand, Singapura, Australia, Kanada, Jepun, Mexico, Peru, Amerika Syarikat, Vietnam dan Malaysia. Perjanjian ini mengandungi kesepakatan dalam perkara berkaitan peraturan dan dasar perdagangan serta ekonomi. Antaranya pengurangan tarif perdagangan, kerangka bersama harta intelek, penyelarasian undang-undang buruh dan keseragaman kaedah pelaburan.

Dijangka perjanjian ini akan

memberi kesan positif dari segi pertumbuhan ekonomi, pertambahan perdagangan, kemasukan pelaburan asing, wujudnya inovasi dan bertambahnya peluang pekerjaan. Pada umumnya kerajaan Amerika Syarikat menyamakan perjanjian ini seperti *Trans-Atlantic Trade and Investment Partnership* (TTIP) iaitu perjanjian perdagangan dan ekonomi antara Amerika Syarikat dengan Kesatuan Eropah.

Walaupun perjanjian TPPA ini telah ditandatangani oleh empat negara iaitu Brunei, Chile, New Zealand dan Singapura pada tahun 2006 tetapi bagi negara-negara lain termasuk Malaysia, perbincangan masih dijalankan terutama yang berkaitan dengan bidang pertanian, harta intelek, perkhidmatan dan pelaburan.

Hakikatnya terdapat beberapa pihak menyatakan kekhawatiran terhadap perjanjian itu. Antaranya dalam kalangan profesional bidang kesihatan, aktivis kebebasan Internet, pencinta alam sekitar, pemimpin kesatuan buruh dan ahli politik. Menurut mereka perjanjian itu dilakukan secara tidak telus, melibatkan skop yang berimpak tinggi dan terdapat klause yang bertentangan dengan dasar serta kepentingan negara.

Apa yang menariknya dalam kebanyakannya rundingan mengenai TPPA adalah berpihak kepada negara kita. Fleksibiliti dan keistimewaan turut diberikan termasuk dalam perolehan sektor awam dan perkara yang tidak melanggar Perlumbagaan atau berkaitan dasar utama negara. Ini termasuk dalam 13 perjanjian perdagangan bebas di mana dasar serta kepentingan Bumiputera tetap diambil kira dan sedia memberikan tempoh peralihan yang lebih panjang.

Selain itu, fleksibiliti turut diberikan kepada syarikat milik kerajaan (GLC) seperti Khazanah Nasional Berhad (Khazanah) dan Petronas yang diminta dikecualikan daripada TPPA. Namun, kata putus hanya dimuktamadkan selepas dib-

incangkan dalam mesyuarat lembaga pengarah GLC tersebut. Sebaliknya itu, semua negara anggota bersetuju agar hak dan peranan PKS tempatan akan tetap dilindungi. Dalam masa yang sama, TPPA juga membuka ruang untuk menggalakkan kemasukan lebih banyak pelaburan langsung asing (FDI) ke negara ini.

Sesungguhnya terdapat bab di dalam TPPA mengenai bina upaya PKS supaya syarikat tempatan mengambil peluang dengan menjadi sebahagian daripada rantaian nilai global. Realitinya pasaran negara kita yang hanya meliputi 30 juta orang penduduk tetapi melalui TPPA akan dapat ditingkatkan daya saing yang lebih luas di peringkat global.

Namun demikian kebimbangan berbagai-pagi pihak tertentu terhadap TPPA seperti kenaikan harga ubat; telah ditegaskan bahawa TPPA tidak seharusnya menghalang akses orang ramai kepada pemilihan ubat dan perkhidmatan penjagaan kesihatan mampu milik. Paten ubat akan kekal selama 20 tahun dan ini tidak menyebabkan perubahan besar kepada negara.

Untuk biologik atau ubatan bukan kimia pula, Malaysia berjaya mempertahankan pendirian supaya eksklusif data untuknya diletakkan selama lima tahun. Mengenai tembakau pula, kerajaan telah membina 'benteng' supaya itu berkaitan keselamatan dan kesihatan tidak boleh dicabar untuk mengelakkan syarikat tembakau akan menyaman kerajaan.

Justeru, seperti yang dinyatakan oleh Menteri Perdagangan Antarabangsa dan Industri, secara umumnya TPPA memberi faedah kepada perkembangan ekonomi negara. Perjanjian ini dapat meningkatkan daya saing produk seperti barang elektronik, kimia, minyak sawit, getah, kayu, tekstil serta komponen automotif ke pasaran yang lebih luas di peringkat global.

PENULIS ialah Pengurus Yayasan Guru Malaysia Berhad dan Pengurus Lembaga Pengarah UniSZA.